

## 2-§. Moliyaviy hisobotda aks ettirish maqsadida qayta tashkil etish amalga oshirilganligining tan olinishi

8. Qo'shib olish shaklida qayta tashkil etish hollarini istisno qilganda, qayta tashkil etish natijasida yuzaga kelgan korxonalar davlat ro'yxatidan o'tkazilgan paytdan boshlab korxona qayta tashkil etilgan hisoblanadi. Korxona unga boshqa korxonani qo'shib olish shaklida qayta tashkil etilganida qo'shib olingan korxonaning faoliyati to'xtatilgani haqidagi yozuv yuridik shaxslarning yagona davlat reyestriga (keyingi o'rinlarda — Reyestr) kiritilgan paytdan boshlab bu korxona qayta tashkil etilgan hisoblanadi.

9. Qayta tashkil etishni amalga oshirishda moliyaviy hisobotni shakllantirish quyidagilar mavjud bo'lgan holda amalga oshiriladi:

a) qayta tashkil etish natijasida vujudga kelgan korxonalarning ta'sis hujjatlari;

b) O'zbekiston Respublikasining qonun hujjatlari bilan belgilangan va mazkur BHMSning [6-bandida](#) ko'rsatilgan ta'sischilar qarori yoki tegishli organlarning qayta tashkil etishga roziligi;

v) O'zbekiston Respublikasining qonun hujjatlari bilan belgilangan hollarda qo'shib yuborish yoki qo'shib olish to'g'risidagi shartnomalar;

g) topshirish dalolatnomasi yoki taqsimlash balansi;

d) O'zbekiston Respublikasining qonun hujjatlariga muvofiq, ro'yxatga oluvchi organ: qo'shib yuborish, bo'lish, ajratib chiqarish va o'zgartirish shaklida qayta tashkil etishda yangi vujudga kelgan korxonalar haqidagi yozuvni; qo'shib olish shaklidagi qayta tashkil etishda

qo‘shib olingan korxonalarning oxirgisi faoliyati to‘xtatilgani haqidagi yozuvni Reyestrda kiritganini tasdiqlovchi hujjat va h.k.

10. Ta‘sischilar qarori (shartnomasi)ga binoan topshirish dalolatnomasi yoki taqsimlash balansiga quyidagi ilovalar qo‘shiladi:

a) qayta tashkil etilayotgan korxona aktivlari va majburiyatlari tarkibi, shuningdek qonun hujjatlarida belgilangan tartibda aktivlar va majburiyatlarni topshirishni rasmiylashtirish sanasidan oldingi oxirgi hisobot sanasiga bo‘lgan ularning bahosi aks ettirilgan, O‘zbekiston Respublikasining «Buxgalteriya hisobi to‘g‘risida»gi Qonuni (O‘zbekiston Respublikasi Oliy Majlisining axborotnomasi, 1996 yil, 9-son, 142-modda)da nazarda tutilgan tarkibda moliyaviy hisobot;

b) topshirish dalolatnomasi yoki taqsimlash balansini tuzish oldidan O‘zbekiston Respublikasi Moliya vazirligi tomonidan 1999 yil 19 oktyabrda EG/17-19-2075-son bilan tasdiqlangan O‘zbekiston Respublikasi Buxgalteriya hisobining milliy standarti (19-son BHMS) «Inventarizatsiyani tashkil etish va o‘tkazish» (ro‘yxat raqami 833, 1999 yil 2 noyabr)ga muvofiq o‘tkazilgan va ularning to‘g‘riligini (aktivlar va majburiyatlarning mavjudligi, holati va bahosini) tasdiqlovchi, qayta tashkil etilayotgan korxonaning aktivlari va majburiyatlarini inventarizatsiya qilish dalolatnomalari (xatlash hujjatlari);

v) moddiy va nomoddiy aktivlar bo‘yicha boshlang‘ich hujjatlar (asosiy vositalar, nomoddiy aktivlar, tovar-moddiy zaxiralar va b.ni qabul qilish-topshirish dalolatnomalari (yukxatlari)), korxonalarni qayta tashkil etishda qabul qilinishi-topshirilishi lozim

bo'lgan boshqa aktivlarning ro'yxatlari (xatlash hujjatlari);

g) qayta tashkil etilayotgan korxonalar davlat ro'yxatidan o'tgan paytdan boshlab mol-mulki va tegishli shartnomalar va kontraktlar bo'yicha majburiyatlari, tegishli byudjetlar, davlat maqsadli jamg'armalari va boshqalar bilan hisob-kitoblar huquqiy vorisga o'tganligi haqida ularning kreditorlari va debitorlariga belgilangan muddatda (qayta tashkil etish haqida qaror qabul qilingan sanadan e'tiboran 30 kundan kechiktirmay) yozma ravishda xabardor etganligi to'g'risidagi axborot ko'rsatilgan kreditorlik va debitorlik qarzlari rasshifrovkasi (ularni xatlash hujjatlari) va b.

11. Topshirish dalolatnomasi va taqsimlash balansi qayta tashkil etilgan korxonaning barcha kreditorlari va qarzdorlariga nisbatan barcha majburiyatlari bo'yicha, shu jumladan taraflar nizolashayotgan majburiyatlar bo'yicha ham, huquqiy vorislik to'g'risidagi qoidalarni o'z ichiga olgan bo'lishi kerak.

Topshirish dalolatnomasi va taqsimlash balansi yuridik shaxs ta'sischilari (ishtirokchilari) tomonidan yoki yuridik shaxslarni qayta tashkil etish to'g'risida qaror qabul qilgan organ tomonidan tasdiqlanadi hamda ta'sis hujjatlari bilan birga yangi vujudga kelgan korxonalarni davlat ro'yxatidan o'tkazish yoki mavjud korxonalarning ta'sis hujjatlariga o'zgartishlar kiritish uchun taqdim etiladi.

12. Topshirish dalolatnomasi yoki taqsimlash balansini belgilangan tartibda tasdiqlash sanasi ta'sischilar yoki qayta tashkil etish haqidagi qarorni qabul qilgan organ tomonidan ta'sischilarning qayta tashkil etish

to'g'risidagi shartnomasi (qarori)da nazarda tutilgan qayta tashkil etishni amalga oshirish muddati doirasida, qonun hujjatlarida nazarda tutilgan zarur taomillar (qayta tashkil etish to'g'risida qaror qabul qilingani haqida kreditorlar, aksiyadorlar va ishtirokchilarni xabardor etish, ularning majburiyatlarni tugatish yoki muddatidan ilgari bajarish va zararlarni qoplash haqida talablar qo'yishi, aktivlar va majburiyatlarni inventarizasiya qilish va b.)dan kelib chiqib belgilanadi.

13. Topshirish dalolatnomasi yoki taqsimlash balansini tuzishni hisobot davri (yili)ning oxiriga yoki qayta tashkil etilayotgan korxonaning berilayotgan aktivlari va majburiyatlarini tavsiflash va baholash uchun asos bo'lgan oraliq (choraklik) moliyaviy hisobot tuzish sanasiga mo'ljallash tavsiya etiladi.